

Gvangjsih Minzcuz Bau

ganhhau: CN45-0036 B.2020 Nd.2 Ng.19 liggaueq gengcej nienz ndwenciengngeihroek

广西民族报

(壮文版)

主管主办: 广西壮族自治区

区民族宗教事务委员会

编辑出版: 广西民族报社

出版期数: 总第 3411 期

Gvangjsih Licouh Yauzcuz Yangh, Vujcon Cin Ndaej Senjhaej Dieg Hagsib Song Vah Daengx Guek Miz Daegsaek

Mboengqneix, Guekgya Minzvej goengbounh gij mingzdan dieg hagsib song vah daengx guek miz daegsaek (dieggoek saedhengz), Gvangjsih Bouxcuengh Swcigih Baksak Si Denzyangz Yen Licouh Yauzcuz Yangh, Hozciz Si Dunghlanz Yen Vujcon Cin 2 dieg ndaej senjhaej.

Ciuq cam rox, Guekgya Minzvej ciuq gij cingzgvang gak dieg bauq, ginggvaq guh lauxhangz bingzsaemj, bouhmonz saemjhaed, goengbounh daengj cwngzsi, caemhcaiq cunghab naemj gij cingzgvang hagsib yungh vah saw guekgya doeng' yungh caeuq vah saw minzcuz vunznoix, dieg faenbounh

daengj gak fuengmienh yinhsu, daengx guek gvaengxlaengx laebdingh le 21 aen dieg hagsib song vah daengx guek miz daegsaek(dieggoek saedhengz), Gvangjsih Licouh Yauzcuz Yangh caeuq Vujcon Cin ndaej senjhaej.

Laeb dieg hagsib song vah daengx guek miz daegsaek(dieggoek saedhengz) dwg vihliux haeujlaeg gvancez gij cingsaenz gangviah youqgaenj Siz Ginbingz cungjsuhgi mizgven vah doxdoeng coicaenh gak minzcuz ngaendoeng nyinhdoengz haenx, net-saed doicaenh hong gak minzcuz dieg minzcuz hagsib yungh vah saw guekgya doeng' yungh caeuq vah saw minzcuz

vunznoix, bangrengz lajmbanj vut gungz gunggeng, coicaenh minzcuz doxgiet.

Licouh Yauzcuz Yangh caeuq Vujcon Cin Gvangjsih ndaej senjhaej dieg hagsib song vah daengx guek miz daegsaek(dieggoek saedhengz) ndaw bi neix hix yaek ciuq mizgven guhhong iugouz caeuq fueng'anq, haiguh hwnjguh dieggoek saedhengz, banh gak cungj hozdung hagsib song vah, coicaenh gak minzcuz doxgyau doxdoeng, vih cuknet gij eijsik Cunghvaz minzcuz caezcaemh, fugsah dangi caeuq guekgya guhhong daihbuenz okrengz.

(Cangh Haijyingh Moz Liujvei)

SIUSIK DINJ

● Geij bi neix daej, vunzlai Cingsih Si Sinhgyaz Yangh Dungbingz Cunh ciuq dieg bae guh, ndaem gvehoengz diegbya, aenvih dienheiq daegbied, hwnz ngoenz dohraej doxca lai, diegnamh hab ndaem gvehoengz caeuq dinfwngz ciep gvehoengz senhcin. Gvehoengz diegbya ndaem okdaej haenx aen hung, van lai, naeng mbang, naih yo naih daeh, ndaej gyoengq canghseng' eijs ndaw gih rog gih haengjgyaz.

(Hoz Byauh)

● Ndwen 2 ngoenz 15, Denzyangz Yen Fulenz, Cunggunghvei lienzhab haiguh aen hozdung gvansim vunz ndaw ranz canghyw, faenbied au byaek, mienh, haeuxsan daengj doxgaiq gwndaenj aeuyungh soengq bae hawj vunz ndaw ranz mbangj boux canghyw guh hong yawhfuengz gaemhanh binghraq lij au ciuqgoq ndaw ranz haenx, camnai vunz ndaw ranz canghyw caemhcaiq gyo-mbaiq gyoengqde, hawj gyoengq canghyw cuengqsim guh hong hoenx binghraq.

(Vangz Gzsun)

● Bi 2019 doxdaej, Denhngoz Yen cujeiz yienh gaep aen doih gangj gij cihsiz fuengz bingh' aishw bae daengz mbanj, segih, gihgvanh, hagdangz haiguh gij hozdung senhconz yawhfuengz bingh' aishw, doeng-gvaq banh fuengz bingh-aiswh cihsiz gyangcoz, bien ciengq fwen fuengz bingh-aiswh, fat senhconz shwliu daengj hingzsi guh senhconz hozdung, gya' gvangq gij naj cwgoemq senhconz cihsiz fuengz bingh' aishw.

(Denz Siyenj)

● Mboengqneix, vunz guhhong Fuzseih Yen Cunggunghvei youq yienhsingz Roendungzcwnz laeb dieg fat goujcau hawj vunzlai mbouj au cienz. Ngoenzhaenx, Fuzseih Yen Cunggunghvei gungh fat goujcau 600 lai aen hawj vunzlai mbouj au cienz, gajgez gij vwndiz vunzlai cawx goujcau hoj, demgiengz gij saenqsim caeuq gietsim gyoengqde hoenx binghraq.

(Vangz Naijafaz)

Sanhgyangh: Cin Raeuj Mbaet Cazcin



Ndwen 2 ngoenz 11, Sanhgyangh Duncuz Swciyen banh aen yizsi mbaet cazcin bi 2020. Laebcin gvaq le, mbwn dauq raeuj, Sanhgyangh Duncuz Swciyen 18.8 fanh moux suencaz laebdaeb maj ngazoiq. Aen yienh neix youq mwh guh ndei gohyoz yawhfuengz gaemhanh binghraq doengzseiz, cujciz vunz ndaem caz mbaet cazcin, guh daengz fuengz raq, mbaet caz song mbouj ngu, baujmaenh vunz ndaem caz laisou. Ndaw doz dwg vunz ndaem caz cingq mbaet caz.

(Vuz Lenyinh/吴练勋)

Bahmaj: Yawhfuengz Gaemhanh Binghraq Caeuq Seizcin Dajndaem Cungj Mbouj Nguh

Seizneix, Hozciz Si Bahmaj Yauzcuz Swciyen daengx yienh gwnz laj cungj gaenxmaenx haiguh hong yawhfuengz gaemhanh binghraq, hoeng neix mbouj yingjangj aen yienh neix guh seizcin dajndaem. Seizneix, aen yienh neix gak dieg vunzlai guh ndei yawhfuengz gaemhanh binghraq doengzseiz, cingq gaemdawz aen seizciet ndei gaenxmaenx guh hong seizcin dajndaem.

Mboengqneix, youq Bahmaj Cin Lungzhungz Cunh dieggoek ndaem makbakhom, dangdieg vunzlai cungj ceng seiz youq ndaw suen makbakhom

400 lai moux haenx raed nga, loek nywj daengj, gyoengq vunz youq ndaw suen nyaengqnyatnyat. "Dou seizneix swnh aen seizciet ndei neix guenjieix makbakhom, muengh bineix mak baenz lai....." Vunzmbanj Lungzhungz Cunh Vangz Lihungz naeuz.

Bouxcuengjleix dieggoek ndaem makbakhom Lungzhungz Cinz Lez naeuz: "Vunzlai daej guhhong dou cungj hawj gyoengqde daep ndei goujcau, guh ndei fuengzhoh banhfp, caemhcaiq youq mwh guhhong vunz caeuq vunz au doxliz gyae di hawj ancienz." Ndaej daengz mizgven bouh-

monz sonyinx, Gyazcon, Yendung daengj yanghecin, vunzlai hix hainduj miz bouhloh dauqfuk guh hong seizcin dajndaem.

Ciuq cam rox, Bahmaj gij doxgaiq dajndaem aeuyungh seizneix gaenq gihbwnj daengzvih, ndawde cehfaen haeuxnaz mauhgvaq 4.28 fanh goeng-gaen, cehfaen haeuxyangz mauhgvaq 10.085 fanh goenggaen, fuzhozfeiz mauhgvaq 5454 dun, niusu mauhgvaq 600 dun, vih nungzyez seizcin dajndaem daezhawj baujcaang rengz-rwd.

(Veiz Minj)